

USTAVNI SUD  
BOSNE I HERCEGOVINE



УСТАВНИ СУД  
БОСНЕ И ХЕРЦЕГОВИНЕ

CONSTITUTIONAL COURT  
OF BOSNIA AND HERZEGOVINA

COUR CONSTITUTIONNELLE  
DE BOSNIE-HERZEGOVINE



Visoko sudsko i tužilačko vijeće Bosne i Hercegovine  
Visoko sudbeno i tužiteljsko vijeće Bosne i Hercegovine  
Високи судски и тужилачки савјет Босне и Херцеговине  
High Judicial and Prosecutorial Council of Bosnia and Herzegovina



## **Memorandum o saradnji**

**zaključen između**

**Ustavnog suda Bosne i Hercegovine**

**i**

**Visokog sudskog i tužilačkog vijeća Bosne i Hercegovine**

**Mostar, novembar 2021. godine**

Ustavni sud Bosne i Hercegovine i Visoko sudsko i tužilačko vijeća Bosne i Hercegovine (VSTV BiH/Vijeće), u daljem tekstu: „Strane“,

S obzirom na obostranu spremnost da se uspostavi okvir za buduću saradnju;

Polazeći od činjenice da Ustavni sud Bosne i Hercegovine kao neovisni čuvar Ustava Bosne i Hercegovine i institucionalni garant za zaštitu ljudskih prava i osnovnih sloboda ustanovljenih Ustavom Bosne i Hercegovine i instrumentima Aneksa I Ustava ima apelacionu nadležnost u pitanjima sadržanim u Ustavu Bosne i Hercegovine kada postanu predmet spora zbog presude bilo kojeg suda u Bosni i Hercegovini kao i činjenice da nosioci pravosudnih funkcija u Bosni i Hercegovini podnose apelacije Ustavnom sudu Bosne i Hercegovine zbog odluka disciplinskih komisija/Vijeća u disciplinskim predmetima koji se vode pred VSTV-om BiH;

Imajući u vidu da je Ekspertska misija (Peer Review) u Bosni i Hercegovini o disciplinskim postupcima u pravosuđu Bosne i Hercegovine (u daljem tekstu: ekspertska misija) organizovana sa namjerom da pomogne VSTV-u BiH u ispunjenju obaveza iz Reformske agende Evropske unije, Strukturiranog dijaloga između Evropske unije i Bosne i Hercegovine o pravosuđu i prilikom implementacije drugih ciljeva od važnosti za dalji proces integracije Bosne i Hercegovine u Evropsku uniju;

Budući da je ekspertska misija izvršila analizu pravila disciplinskog postupka i disciplinskih mjera u pravosuđu u Bosni i Hercegovini kojom ukazuje na neophodnost saradnje Strana te da je radi očuvanja povjerenja javnosti u pravosuđe neophodno osigurati brzo postupanje Ustavnog suda Bosne i Hercegovine u predmetima koji se vode po zahtjevu/apelaciji nosilaca pravosudnih funkcija pred Ustavnim sudom Bosne i Hercegovine;

Svjesni činjenice da član 6. stav (1) Evropske konvencije za zaštitu ljudskih prava i osnovnih sloboda, državama ugovornicama nameće dužnost organizirati svoje pravosudne sisteme na takav način da njihovi sudovi mogu ispuniti svaki od njegovih zahtjeva, uključujući i obavezu postupanja u predmetima u razumnom roku;

Imajući na umu standarde Evropskog suda za ljudska prava u pogledu prava na pravično suđenje u razumnom roku;

Sa ciljem da se kontinuirano utiče na unapređenje pravosuđa kao ključne vrijednosti za osiguranje vladavine prava, te da se podrži nastojanje pravosuđa Bosne i Hercegovine da se približi standardima Evropske unije u oblasti pravosuđa;

Uvjereni da će razmjena saradnje biti obostrano korisna i da će u skladu sa evropskim standardima, promovisati najviši nivo odgovornosti, efikasnosti i profesionalizma;

Strane su pristupile potpisivanju ovoga Memoranduma o saradnji, u daljem tekstu „Memorandum“, i to kako slijedi:

**Član 1.**  
**(Predmet i cilj)**

- (1) Predmet ovog Memoranduma je uspostavljanje saradnje Strana o pitanjima koja su od zajedničkog interesa, te definisanje okvira i modaliteta te saradnje, s ciljem njenog efikasnog i potpunog ostvarenja.
- (2) Strane su saglasne da međusobna saradnja ima za cilj jačanje vladavine prava, povećanje efikasnosti pravosuđa Bosne i Hercegovine, te jačanje povjerenja javnosti u pravosudni sistem Bosne i Hercegovine, prije svega kvalitetom sudskih odluka i pravovremeno pruženom sudskom intervencijom za kojom je posegnuto.

**Član 2.**  
**(Oblici saradnje)**

- (1) Ustavni sud Bosne i Hercegovine će prioritetno postupati po apelacijama podnesenim od strane nosilaca pravosudnih funkcija nakon donošenja odluke u disciplinskim postupcima provedenim u Visokom sudskom i tužilačkom vijeću BiH.
- (2) Ustavni sud Bosne i Hercegovine će apelacije iz stava (1) ovog člana u skladu sa Pravilima Ustavnog suda Bosne i Hercegovine tretirati kao hitne i rješavati u najkraćem mogućem roku.
- (3) VSTV BiH će Ustavnom sudu Bosne i Hercegovine, prioritetno dostaviti tražene podatke potrebne za odlučivanje po apelacijama iz stava (1) ovog člana u cilju efikasnog vođenja i okončanja postupka pred Ustavnim sudom Bosne i Hercegovine.

**Član 3.**  
**(Okončanje započetih predmeta)**

Postupci u predmetima koji su započeti do dana stupanja na snagu ovog Memoranduma dovršit će se u skladu sa ovim Memorandumom.

**Član 4.**  
**(Namjere Strana)**

Strane iskazuju namjeru da, po potrebi, sazivaju sastanke radi razmjene podataka i pregleda ostvarenih rezultata u aktivnostima koje se provode na temelju ovog Memoranduma.

**Član 5.**  
**(Promicanje saradnje)**

Strane su saglasne da se uspostavljena saradnja treba i dalje razvijati i unapređivati, te kontinuirano djelovati u tom pravcu.

**Član 6.**  
**(Stupanje na snagu i trajanje)**

- (1) Memorandum se zaključuje na neodređeno vrijeme.
- (2) Memorandum stupa na snagu danom potpisivanja.

**Član 7.**  
**(Ostale odredbe)**

- (1) Izmjene i dopune Memoranduma mogu se vršiti samo dogovorom Strana i pismenim putem.
- (2) Memorandum je zaključen u 4 (četiri) istovjetna primjerka, po 2 (dva) za svaku Stranu.

  
Za Ustavni sud Bosne i Hercegovine:  
  
**Mato Tadić**  
**Predsjednik Ustavnog suda**  
**Bosne i Hercegovine**

  
Za Visoko sudsko i tužilačko vijeće  
Bosne i Hercegovine  
  
**Halil Lagumdžija**  
**Predsjednik Visokog sudskog i**  
**tužilačkog vijeća Bosne i Hercegovine**

Broj: SU-02-977/21

Datum: 18.11.2021. godine

Broj: 01-50-2-3892/2021

Datum: 18.11.2021. godine